

POPERA GA EPÉCHIUWA JEXMAGÜXÛ GA JAXÕGÜXÛTANÜWA NAMUXÛ GA PAURU

**Pauru rü nüxü narümoxê ga
jema jaxõgüxü ga Epéchiuarü
iãnewa jexmagüxü**

1 ¹Pa Chaueneëgü ja Epéchiuwa Ngêxmagüxe, chama i Pauru nixí i pexçax chanaxümatüxü i nhaã popera. Rü chama i Pauru chixí i Tupana choxü jaxuxü na Ngechuchu ja Cristu choxü muxüçax na duüxügümaã nüxü chixuxüçax i norü ore. Rü pexçax chanaxümatü i guxãma i pema ja Epéchiuarü iãnewa ngêxmagüxe rü Tupanaãrü duüxügü ixigüxe rü Ngechuchu ja Cristuaxü jaxõgüxe. ²Rü chanaxwaxe i pexü narüngüxêê rü pexü nataãêxêê ja Tanatü ja Tupana rü tórü Cori ja Ngechuchu ja Cristu.

**Tupana rü poraãcü tüxü
narüngüxêê erü Cristuarü
duüxügü tixigü**

³Rü name nixí i nüxü ticuaxüügü ja Tanatü ja Tupana ja tórü Cori ja Ngechuchu ja Cristunatü. Rü name nixí i ngêmaãcü tanaxü erü nhuxma na Cristuarü duüxügü ixigüxü, rü nüma ja

Tupana rü dauxüwa taxçax ne nanamu i nagúxüraüxü i ngüxêê i Naãê i Üünexüwa ne íxü i tórü maxüçax ixíxü. ⁴⁻⁵Rü tautama naãne üxgu, rü Cristugagu Tupana tüxü nidexechi na napexewa ixüünegüxüçax rü na nataxuxüçax i tórü chixexü i napexewa. Rü Tupana rü poraãcü tüxü nangechaü. Rü jemacax nuxcümamatama tüxü naxuneta na naxãcügüxü tüxü nadexüçax Ngechuchugagu. Rü jemaãcü nanaxü jerü jema nixí ga norü ngúchaü. ⁶Rü ngêmacax name nixí i guxüguma nüxü ticuaxüügü ja Tupana. Erü nüma rü poraãcüxüchima tamaã namecüma rü poraãcü tüxü narüngüxêê ga jexguma taxçax núma namuãxgu ga Nane ja nüxü nangechaüxüchicü. ⁷Rü Tupana rü poraãcü tüxü nangechaü, rü jemacax nanamu ga Nane na taxçax najuxü rü nagü inabaxü na jemaãcü tüxü íngangüxüêêçax rü tüxü nüxü nangechaüxüçax ga tórü pecadugü. ⁸Rü Tupana tüxü nüxü nadauxêê na nhuxãcü poraãcü tüxü nangechaüxü ga jexguma tüxna naxããxgu ga guxüma ga tórü cuçax na taãêxü icuaxüçax rü tüxü

natauxchaxũcax i norü ore. ⁹Rü tüxũ nüxũ nacuxẽẽ ga norü ngúchaũ ga noxri nüxĩcatama nüxũ nacuáxũ. Rü jema norü ngúchaũ ga nuxcũmaxũchima Cristumaã nagu naxĩnũxũ ga Tupana, rü jema nixĩ ga nhama ga naãnewa na namuãxũ na tüxũ jamaxẽẽxũcax. ¹⁰Rü jema nagu naxĩnũxũ nixĩ na Cristumexẽwa nangẽxmaxẽẽxũ i guxũma i dauxũguxũ i naãnewa ngẽxmaxũ rü guxũma i nhama i naãnewa ngẽxmaxũ. Rü ngẽmaãcü tá nanaxü ja Tupana i ngẽxguma nawa nanguxgu na janguxẽẽxũ. ¹¹Jerü nuxcũmamatama Tupana toxũ nidexechi na Cristugagu tanajauxgũxũcax i ngẽma maxũ i taguma gúxũ i nüma toxna naxãxchaũxũ. Rü aixcuma jemaãcü toxũ narüingũxẽẽ jerü jema nixĩ ga norü ngúchaũ ga Tupana ja guxũma ücü, ngẽma nüma nagu naxĩnũxũãcüma. ¹²Rü jemaãcü Tupana toxũ nidexechi na naxcax tamaxẽũcax rü nüxũ ticuxũũgũxũcax naxcax na tomaã namecũmaxũ i toma i toxira Cristuaxũ na tajaxögũxũ. ¹³Rü jexgumarũũ ta ga pema i Epéchiucũãxgü, rü jexguma nüxũ pexĩnũẽgu ga jema ore i aixcuma ixĩxũ i tüxũ maxẽẽxũ, rü jexguma Cristuaxũ pejaxögügu, rü natanũxũgü peixĩgü. Rü Tupana ga tamaã ixunetacü na tüxna namuãxũcax i Naãe i Üünexũ, rü marü pexna nanamu i ngẽma Naãe na nüxũ pecuáxũcax na aixcuma norü duũxũgü peixĩgũxũ. ¹⁴Rü nüma ga Tupana núma nanamu ga Naãe i Üünexũ na nawa nüxũ icuáxũcax na aixcuma tá tüxna naxããxũ i guxũma ga jema tamaã inaxunetaxũ. Rü jixema na

noxrũ ixĩgũxũ rü tá aixcuma tanajaxu i guxũma i ngẽma tamaã inaxunetaxũ i ngẽxguma wena núma naxũxgu na pecaduwa tüxũ íjanguxũẽẽxũchixũcax. Rü ngẽmacax name nixĩ na nüxũ icuáxũũgũxũ ja Tanatü ja Tupana ja mexẽchicü.

**Paurü rü Tupanana naxcax
naca na jema jaxögũxũna
naxããxũcax ga cuax**

¹⁵⁻¹⁶Rü ngẽmacax, nhuxma na nüxũ chacuáxũ na aixcuma tórü Cori ja Ngechuchuaxũ pejaxögũxũ rü na aixcuma nüxũ pengechaũgũxũ i guxũma i ngẽma togü i Tupanaãrü ixĩgũxũ, rü ngẽmacax taguma nüxũ charũchau na pexcax moxẽ nüxna chaxãxũ rü pexna chacuáxãchixũ i chorü jumuxẽwa. ¹⁷Rü ngẽxguma namaã chidexagu ja Tanatü ja Tupana ja mexẽchicü ja Nanatü ja tórü Cori ja Ngechuchu ja Cristu, rü naxcax nüxna chaca na pexna naxããxũcax i ngẽma cuax i Naãe i Üünexũwa ne üxũ. Rü ngẽma Naãe i Üünexũ tá nixĩ i pexcax nangoxẽẽxũ i Tupanaãrü ore i mexũ na jexeraãcü nüxũ pecuáxũcax ja Tupana. ¹⁸Rü Tupanana naxcax chaca na nümatama pexũ jangoxnaãẽẽxũcax, na nüxũ pecuáxũcax na tacü jĩixũ i ngẽma ípenanguxẽẽxũ i naxcax pexũ jadexechixũ. Rü nüxna naxcax chaca na pexũ nüxũ nacuxẽẽxũcax na nhuxãcü namexẽchixũ i ngẽma maxũ i taguma gúxũ i nüma norü duũxũgũcax namexẽẽxũ i dauxũguxũ i naãnewa. ¹⁹⁻²⁰Rü ngẽxgumarũũ ta rü nüxna naxcax chaca na pexũ nüxũ nacuxẽẽxũcax na nhuxãcü nataxũchixũ

i norū pora i tawa ngēxmaxũ rü namaã tüxũ nangũxēxũ i jixema na jaxōgũxũ. Rū ngēmatama pora i taxũmaã nixĩ ga napuracũxũ ga Tupana ga jexguma juwa Cristuxũ ínadxēēgu rü dauxũguxũ ga naãnewa nagaãxgu rü nüğüarü tügüncüwawa janatoxēēāgu na guxãārü āēxgacü jĩixũcax. ²¹Rü jemaãcü guxũētüwa nanajexmaxēē. Rū ngēmacax i nhuxma rü Cristumexēwa nangēxmagü i guxũma i dauxũguxũ i naãnecũāx i āēxgacügü rü guxũma i nhama i naãnecũāx i āēxgacügü. Rū ngēmaãcü naxmexwa nangēxmagü i guxũma i pora i nhuxma ngēxmagũxũ rü guxũma i pora i tá ngēxmagũxũ. Rū ngēmaãcü i nüma rü guxũ i āēxgacügüarü āēxgacü tá nixĩ i guxũguma. ²²Rü jemaãcü ga Tupana rü marü Cristumexēwa nanajexmagũxēē ga guxũma. Rü jexgumarũũ ta Cristuxũ ningucuchixēē na guxũma i jaxōgũxũēru na jĩixũcax. ²³Rü nhuxma rü guxũma i jaxōgũxũ rü wũxigu Cristuarü nixĩgü. Rū nüma nixĩ i tawa nangēxmaxũ i guxãma i jixema i nüxũ na jaxōgũxũ. Rū ngēxgumarũũ ta nüma nixĩ i nangēxmaxēēāxũ i guxũma i ſacü i ngēxmaxũ i guxũwama.

**Tamaxē erü Tupana tüxũ
nangechaũ**

2 ¹Rü ũpa ga pema rü perü pecadugagu rü perü chixexũgagu nhama pejuexũrũũ peixĩgü. ²Jerü ga pema rü nagu pexĩ ga jema chixexũ i nhama i naãnecũāx i duũxũgü nagu ĩxũ. Rū pema rü naga pexĩnũē ga Chataná i ngoxogüarü āēxgacü ĩxũ. Rū nüma nixĩ i nüxũ nangúchaũxēēāxũ na chixexũ naxüğüxũcax i guxũma i ngēma

duũxũgü i tama Tupanaga ĩnüēxũ. ³Rü guxãma ga jixema rü jemaãcü chixri tamaxē ga ũpa. Rū tanaxü ga tóxrütama ngúchaũ, rü nagu taxĩ ga jema taxüne naxwaxexũ rü jema taãē naxwaxexũ. Rū jemagagu jema togü ga duũxũgü ga chixexũ ügüxũrũũ nawa taxüğü i ngēma pocu i āñcũmaxũchixũ i Tupana mexēēxũ. ⁴Notürü ga Tupana rü poraãcü nüxũ tangechaũtümũgü rü poraãcü tüxũ nangechaũ. ⁵Rü jemacax, woo tóru pecadugagu nhama ijuexũrũũ tixĩgü, notürü ga Tupana rü Cristuxũ ínadxēēxũgagu tüxũ namaxēxēē. Rū nhuxma rü pexũ nangēxma i maxũ i taguma gúxũ, erü Tupana pemaã namecũma. ⁶Rü jema na Ngechuchu ja Cristuxũ wena namaxēēxũrũũ rü tüxũ rü ta namaxēxēē ga Tupana. Rū jemaãcü nanaxü na jixema rü ta Cristumücügü ĩxĩgũxũcax, rü namaã āēxgacügü ĩxĩgũxũcax i dauxũguxũ i naãnewa. ⁷Rü jemaãcü nanaxü ga Tupana na guxũgutáma duũxũgũxũ nawaxũcax na nhuxãcü Cristugagu poraãcü tüxũ nangechaũxũ rü tamaã namecũmaxũ. ⁸Rü jemaãcü pemaã namecũma ga Tupana. Rū jemacax penajaxu ga maxũ i taguma gúxũ jerü pejaxōgü. Rū ngēma maxũ rü taxucürüwama pegünatama penaxã, notürü Tupana nixĩ ga pexna naxãmarecü ga jema. ⁹Rü tama ſacü i mexũ i pexũxũcax nixĩ i pexũ nangēxmaxũ i ngēma maxũ, notürü Tupana nixĩ ja pexna naxãmarecü na ngēmaãcü taxúema tügü icuaxũxũcax. ¹⁰Rü Tupana nixĩ ga tüxũ maxēxēēcü. Rū nhuxma rü tüxũ nangēxma i ngēma maxũ jerü Ngechuchu ja Cristu tóru pecaducax naju. Rū Tupana tüxna

nanaxã i ngẽma maxũ na meã
 imaxẽxũçax rü mexũ ixĩgũxũçax. Rü
 jemaãcü tüxũ narüngũxẽẽ ga Tupana
 jerü woetama nuxcũmaxũchima marü
 jemagu narüxĩnũ.

Cristu nixĩ ja tüxũ rüngũxmüẽxẽẽcü

¹¹⁻¹²Rü ngẽmacax i pema na tama
 Judéugü peixĩgũxũ, rü name nixĩ i
 nüxna pecuaxãchie na tama toxrüũ na
 peixĩgũxũ ga noxri rü tama Tupanaxũ
 na pecuaxgũxũ. Rü jema na tama toxrüũ
 peixĩgũxũ rü jemacax ga toma ga
 Judéugü i togü na
 ítawiechaxmüpexechiraũgũxũ, rü nüxũ
 tixugüe na pema rü tama
 Tupanapexewa na pemexũ jerü tama
 toxrüũ pegü
 ípewiechaxmüpexechiraũgũ. Rü
 jexguma ga pema rü tama Cristuxũ
 pecuaxgü, jerü tama Tupanaãrü
 duũxũgü i Judéugütanüxũ peixĩgü. Rü
 tama nüxũ pecuaxgü ga Tupana núma
 na namuxũ ga Nane na duũxũgüaru
 pecaducax najuxũçax na nüxna
 naxããxũçax i maxũ i taguma gũxũ. Rü
 woo ga jema mexũgü ga Judéugümaã
 inaxunetaxũ ga Tupana, rü taxucürüwa
 penajaxu. Jerü nhama ga naãnewa rü
 pemaxẽmare, rü tama nüxũ pecuax ga
 țacü chi pexũ na üpetüxũ ga jexguma
 chi pejuegu jerü tama Tupanaxũ pecuax.
¹³Notürü woo ga noxri rü tama
 Tupanaxũ na pecuaxũ, notürü i nhuxma
 rü nügũxütawa pexũ nagagü. Rü
 Ngechuchu ja Cristuarü duũxũgü
 peixĩgü jerü pexçax naju rü nagü
 inanaba. ¹⁴⁻¹⁵Rü nhuxma rü Cristu nixĩ
 ja tüxũ rüngũxmüẽxẽẽcü. Rü noxri ga
 toma ga Judéugü rü pechi taxaie jerü

tama toxrüũ Judéugü peixĩgü. Notürü i
 nhuxma rü Cristu marü jigümaã tüxũ
 narüngũxmüẽxẽẽ. Rü jemaãcü
 wüxitama i duũxũgũxũ tüxũ nixĩgũxẽẽ
 rü inajanaxoxẽẽ na jigüaru uwanü
 ixĩgũxũ. Rü jexguma najuxgu ga Cristu
 rü tüxũ ínanguxũxẽẽ na tama natüüwa
 ijexmagũxũçax ga jema nuxcũmaxũgũxũ
 ga mugü ga toma ga Judéugü nagu
 taxĩxũ. Rü wüxitama i duũxũgü i
 ngexwacaxũxũ tüxũ nixĩgũxẽẽ i toma i
 Judéugü na tixĩgũxũ rü pema i tama
 Judéugü na peixĩgũxũ. Rü jemaãcü
 nanaxü na guxãma i jixema rü norü
 duũxũgü na ixĩgũxũçax. Rü jemaãcü
 jigümaã tüxũ inarüngũxmüẽxẽẽ. ¹⁶Rü
 jexguma curuchagu najuxgu ga Cristu,
 rü inajanaxoxẽẽ ga jigüchi na ixaieũ.
 Rü jemaãcü ga Cristu rü Tupanamaã
 tüxũ inarüngũxmüẽxẽẽ, rü wüxitama i
 duũxũgũxũ tüxũ nixĩgũxẽẽ. ¹⁷Rü
 jexguma Cristu núma üxgu, rü taxçax
 núma nanange ga ore ga mexũ ga marü
 jigümaã rü Tupanamaã na
 rüngũxmüẽxũ. Rü jema ore rü toxçax
 nixĩ i toma i Judéugü ga toxira
 Tupanaxũ na tacuaxũ. Rü jema ore rü
 pexçax rü ta nixĩ ga woo tama
 Tupanaxũ na pecuaxgũxũ ga noxrix.
¹⁸Rü nhuxma rü guxãma i jixema rü
 Cristugagu tüxũ natauxcha na Tanatü ja
 Tupanana ingaicamagũxũ. Rü
 ngẽmatama Naãe i Üünexũ nixĩ i tüxũ
 rüngũxẽẽxũ na nüxna
 ingaicamagũxũçax ja Tanatü ja Tupana.
¹⁹Rü ngẽmacax i pema rü woo tama
 Tupanaxũ pecuaxgü ga noxrix, rü woo
 tama norü duũxũgü peixĩgü ga jexguma,
 notürü tama ngẽmaãcü peixĩgü i
 nhuxmax. Erü nhuxma rü natanüxũ

peixīgü i guxūma i ngēma duūxūgü i Tupanaārü ixīgūxū. Rū aixcuma Tupanaxācūgūxūchi peixīgü i nhuxmax.²⁰⁻²²Guxāma i pema rü wūxi ja ipata ja mexūne ja Tupana nawa maxūne peixīgü. Rū ngēma chimentu i tijuru naētūgu nugūxū, rü ngēma rü Tupanaārü ngūexūgü ga imugūxū rü norü orearü uruūgü nixī. Rū jima tijuru ja nūxīrama chimentuētūwa ixücuchicü rü Cristu nixī. Rū ngēma inanaxūgü na naxūāxū ja guxūnema ja jima ī. Rū dūxwa ningu na wūxi ja tupaucā ja taxūne ja Cristugagu üunene na jīxū. Rū ngēmaācū i pema na Cristuarü peixīgūxū rü wūxigu tomaā pejanguxēē ja wūxi ja tupaucā ja taxūne i ngextā Tupanaāē i Üünexū ímaxūxūwa.

Tupana rü Pauruxū namu na ore i mexūxū jaxuxū namaā ga jema duūxūgü ga tama Judéugü ixīgūxū

3¹Rū nhuxma na jemaācū Tupana pexū rüngūxēēxū, rü chama i Pauru rü pexçax çajumuxē. Rū pemaā nūxū chixu rü nūma pocupataūwa changēxma erü Ngechuchu ja Cristuarü duūxū chixī. Rū nuxma chapocu erü guxūwama nūxū chixuchiga na pema rü ta pexū nangēxmaxū i pechica i Tupanaxūtawa woo na tama Judéugü peixīgūxū. ²Rū maneca marü nūxū pecuāchiga na nhuxācū Tupana choxū nangechaūācūma choxū muxū na pexū charüngūxēēxūçax rü pemaā nūxū chixuxūçax i norü ore i mexū. ³Rū Tupana chamaā nanangoxēē rü choxū nūxū nacuaxēē ga jema ore ga pechiga ga noxri nūxīcatama nūxū nacuáxū. Rū jemachiga nixī ga íraruwa marü pexçax

chaxūmatūxū ga noxrix. ⁴Rū jexguma pexçax chanaxūmatūgu rü pemaā nūxū chixu ga jema noxri ēxūguxū ga ore i nhuxācū Tupana rü Cristugagu duūxūgūxū namaxēēēxū. Rū ngēxguma meā nawa pengúegu i ngēma popera rü tá nūxū pecuax na aixcuma jīxū ga jema ore ga noxri ēxūguxū ga nachiga pexçax chaxūmatūxū. ⁵Rū jema nixī ga ore ga ēxūguxū ga Tupana taxūexūma meā nūxū nacuaxēēxū ga noxrix. Notürü i nhuxma rü ngēma Naāē i Üünexū rü marü nanangoxēē i ngēma ore naxçax i Tupanaārü duūxūgü i üünexū i jamugūxū rü norü orearü uruūgü. ⁶Rū nhuxma rü tá pemaā nūxū chixu i nhuxācū na jīxū i ngēma ore ga noxri ēxūguxū. Rū dücax, woo tama Judéugü peixīgü notürü i nhuxma rü pexçax rü ta nixī i ngēma maxū i taguma gūxū ga noxri Tupana tomaā ixunetaxū. Rū nhuxma i pema rü ta norü duūxūgü peixīgü. Rü pexçax nixī i guxūma i ngēma Tupanaārü unetagü ga noxri tomaā nūxū jaxuxū. Rū ngēmaācū i nhuxma rü Ngechuchu ja Cristugagu pexū nangēxma i guxūma i ngēma mexūgü erü pejaxōgü i norü ore i tūxū maxēēēēxū. ⁷Rū woo taxuwama chame na chanaxūxūçax i norü puracü, notürü ja Tupana rü choxū namuāma rü choxū naporaxēē na nūxū chixuxūçax i ngēma norü ore i mexū. ⁸Rū chaugūçax i Tupanapexewa rü chama nixī i guxū i norü duūxūgūarü nhaxtuwaama chaxūxū. Rü woo ngēmaācū chixī, notürü Tupana choxū nangechaū rü choxna nanaxā i ngēma puracü i mexū na ngēma tama Judéugü ixīgūxemaā nūxū na chixuxūçax i norü ore i mexū

na nhuxācü namexēchixŭ rŭ taguma ijagŭxŭ ga jema taxcax naxŭxŭ ga Cristu. ⁹Rŭ nŭma ga Tupana ja guxŭārŭ ũruŭ ixŭcü, rŭ choxŭ namu na guxŭ i duŭxŭgŭxŭ nŭxŭ chacuaxēxŭcax na nhuxācü jŭixŭ i ngēma norŭ ngŭchaŭ ga nuxcŭma ēxŭguxŭ ga noxri nŭxŭcatama nŭxŭ nacuáxŭ. Rŭ ngēma norŭ ngŭchaŭ nixŭ i Cristugagu tŭxŭ na namaxēxēxŭ. ¹⁰Rŭ jemaācü choxŭ namu ga Tupana na ngēma duŭxŭgŭ i tama Judéugŭ ixŭgŭxŭmaā nŭxŭ chixuxŭcax i ore i mexŭ na jaxōgŭāxŭcax. Rŭ nŭma ja Tupana nanaxwaxe na jaxōgŭāxŭ na ngēmaācü guxŭma i āēxgacŭgŭ i dauxŭcŭāx nŭxŭ nadaugŭxŭcax na nhuxācü nŭxŭ nacuaxŭchixŭ ga Tupana ga jexguma duŭxŭgŭaxŭ natauxchaxēēāgu na naxŭtawana nangugŭxŭcax. ¹¹Rŭ jemaācü nŭxŭ nanatauxchaxē ga Tupana jerŭ woetama nuxcŭmaxŭchima guxŭguma nagu narŭxŭnŭ na tōrŭ Cori ja Ngechuchu ja Cristugagu tá na namaxēxēāxŭ i duŭxŭgŭ. Rŭ jemaācü najanguxē. ¹²Rŭ nhŭxma na Cristuarŭ duŭxŭgŭ ixŭgŭxŭ rŭ nŭxŭ na jaxōgŭxŭ, rŭ tŭxŭ natauxcha na Tupanana ingaicamagŭxŭ rŭ taxuŭcaxma nŭxŭ na imuŭēxŭ. ¹³Rŭ ngēmacax i nhŭxma na pexcax ngŭxŭ chingexŭ rŭ pexŭ chacaxŭ na tama chauxcax pexoegaāēgŭxŭcax. Erŭ ngēma ngŭxŭ na chingexŭ i nhŭxma rŭ perŭ meruŭ nixŭ i ngēma.

Cristu rŭ poraācü tŭxŭ nangechaŭ

¹⁴Rŭ ngēmacax, ngēxguma nagu charŭxŭnŭgu na nhuxācü Tanatŭ ja Tupana taxcax namexēxŭ na

naxācügŭ ixŭgŭxŭcax, rŭ napexegu chacaxápŭxŭ na nŭxŭ chicuaxŭxŭcax. ¹⁵Rŭ nŭma nixŭ i Nanatŭ jŭixŭ i guxŭma i norŭ duŭxŭgŭ i nhama i naānewa rŭ dauxŭguxŭ i naānewa ngēxmagŭxŭ. ¹⁶Rŭ Tanatŭ ja guxŭguma poraācü tamaā mecŭmacŭna chaca na Naāē i Ũnexŭārŭ ngŭxēmaā pexŭ naporaexēxŭcax na aixcuma peporaexŭcax i perŭ maxŭwa. ¹⁷⁻¹⁸Rŭ ngēxgumarŭ ta nŭxna naxcax chaca na perŭ ōgagu pewa namaxŭxŭcax ja Cristu. Rŭ ngēxguma ngēmaācü perŭ maxŭwa peporaegu rŭ pexŭ nangēxmagu i ngēma ngechaŭ i aixcuma ixŭxŭ, rŭ tá wŭxigu guxŭma i jaxōgŭxŭmaā nŭxŭ pecuax na nhuxācü nataxŭchixŭ i norŭ ngechaŭ i namaā tŭxŭ nangechaŭxŭ ja Cristu. ¹⁹Rŭ woo tama janguxgu i tōrŭ cuax na nŭxŭ icuáxŭcax na nanhuxraŭxŭ i ngēma ngechaŭ i namaā Cristu tŭxŭ ngechaŭxŭ, notŭrŭ Tupanana naxcax chaca na pexcax nangoxēāxŭcax na nhuxācü na jŭixŭ i ngēma ngechaŭ na aixcuma pewa nangēxmaxŭ i guxŭma i Tupanacŭmagŭ. ²⁰Rŭ nhŭxma rŭ name nixŭ i guxāma i jixema rŭ nŭxŭ ticuaxŭgŭ ja Tupana. Erŭ nŭma rŭ nŭxŭ nangēxma i pora na naxŭāxŭ i guxŭma i ngēma naxcax ŭcaxŭ rŭ exna nagu rŭxŭnŭēxŭārŭ jexeraxŭchi. Rŭ ngēma norŭ pora i tawa ngēxmaxŭmaā nixŭ i naxŭāxŭ i guxŭma i ngēma. ²¹Rŭ nhŭxma rŭ name nixŭ i guxŭma i norŭ duŭxŭgŭ i jaxōgŭxŭ rŭ guxŭgutáma Tupanaxŭ nicuaxŭgŭ naxcax i ngēma Ngechuchu ja Cristu ŭxŭ. Rŭ ngēmaācü jŭixŭ.

**Tupanaãe i Üünexũ rü wüxigutama
tüxũ narüxinüëxêe**

4 ¹Rü nhuxma na ngêmaãcü Tupana tüxũ rüngüxêëxũ, rü chama i Cristugagu na chapocuxũ, rü pexũ chacaxã na Tupana naxwaxexũãcuma meã pemaxêxũ. Rü name nixĩ i ngêmaãcü pemaxê erü pexũ nixĩ ga jadexechixũ ga Tupana, rü norü duũxũgü peixĩgü i nhuxmax. ²Rü chanaxwaxe i pegü íperüífragü rü tama pegü peicuaxũüügü. Rü name nixĩ i meã togü i duũxũgüxũ pejaxu rü namaã pemecümagü rü jaxna namaã pexĩnüë. Rü name nixĩ i pegü pengechaüãcuma pegü perüngüxêëgü. ³Rü nhuxma rü wüxigu perüxĩnüë rü nhama wüxitama i duũxũrüü peixĩgü erü pewa nangêxma i Tupanaãe i Üünexũ. Rü name nixĩ i naxçax pedau na guxũguma ngêmaãcü meã pegümaã pemaxêxũ rü pegü pengechaũgüxũ na taguma ãacüçax na pegü peitojexũ. ⁴Erü jixema na Cristuarü duũxũgü ixĩgüxũ, rü nhama wüxitama i duũxũrüü tixĩgü. Rü ngêxgumarüü ta wüxitama nixĩ i Naãe i Üünexũ i guxãwama maxũxũ. Rü ngêxgumarüü ta Tupana pexũ nidexechi na guxãma ípenangüxêëgüxũçax i wüxitama i maxũ i taguma gúxũ. ⁵Rü wüxitama nixĩ ja tórü Cori, rü wüxiaxũtama nixĩ i jaxögüxũ rü wüxicaçicatama nixĩ ga íbãiũxũ ga guxãma. ⁶Rü wüxitama nixĩ ja Tupana ja guxãnatü ixĩcü. Rü nüma rü guxãéüwama nangêxma rü guxãwama namaxũ. Rü nüma rü guxãxũ narüngüxêë na tanaxũxũçax i norü puracü. ⁷Notürü wüxichigü i jixema rü

tanajaxu i ngêma nacüma rü ngêma cuax i Cristu tüxna ãmarechaũxũ na naxügüxũçax i norü puracü. ⁸Rü ngêmaçax i Tupanaãrü ore i ümatüxüwa rü nhanagürü:

“Rü jexguma dauxũguxũ ga naãnewa naxüxgu, rü jéma tüxũ nagagü ga guxema marü nüma tüxũ najexeraxe. Rü norü duũxũgüna nanaxã ga nacüma i mexũ”,

nhanagürü i ngêma orewa. ⁹Rü nhuxma Pa Chaueneëgüx, rü pexna chaca, rü çtacüchiga nixĩ i ngêma ore i nhaxũ, “Dauxüwa naxü”, nhaxü? Rü düçax, ngêma nixũ tacuax ga noxri rü nhama ga naãnegu na ínaxĩxũ ga nümax. ¹⁰Rü gumatama Cristu ga nhama ga naãnegu íruxĩcü, rü gumatama nixĩ ga dauxũguxũ i naãne i Tupana íngêxmaxüwa üxcü na guxãéüwama nangêxmaxũçax rü guxüwama nangêxmaxũçax. ¹¹Rü nümatama nixĩ ga guxema norü duũxêgüna naxããxũ ga tümaãrü cuax rü tümaãrü puracü. Rü tüxũ naxuneta ga nhuxre na toxnamana tüxũ namugüxũçax na jéma tanaxũxũçax ga norü puracü. Rü tüxũ naxuneta ga ãoguãx na tanangoxêëxũçax ga norü ore. Rü tüxũ naxuneta ga ãoguãx na togümaã nüxũ tixuxũçax ga jema norü ore. Rü tüxũ naxuneta ga ãoguãx na jema jaxögüxũãrtü darüü na tixĩgüxũçax. Rü tüxũ naxuneta ga ãoguãx na duũxügüxũ tangüxêëxũçax ga norü ore. ¹²Rü jemaãcü norü duũxêgüna nanaxã ga tümaãrü puracü rü tümamaã inanangüxũçêë na ngêma jaxögüxũxũ tarüngüxêëgüxũçax na ngêmaãcü

guxūma i ngēma jaxōgūxū rü jexeraācü nūxū jacuāetanūxūcax i norū ore. ¹³Rü Cristu nanaxwaxe na ngēma norū orewa ijaetanūxū i guxāma i jixema nhuxmatáta wūxigu aixcuma meā jaxōgū rü meā nūxū icuaxgū ja Tupana Nane. Rü ngēmaācü tá dūxwa nawa tangugū na aixcuma Tupana naxwaxexūācūma ixīgūxū, rü tá tijaetanū i norū orewa nhuxmatáta nhama Cristu ja aixcuma mexēchicürūū ixīgū. ¹⁴Rü tāxūūtáma nhama buxūgürūū tixīgū i tórū maxūwa. Erü ngēma buxūgū rü tauxchaācü toguama narūxīnūē. Rü ngēxguma tacū rü to i nguxēetaexū naxīnūēgu rü ngēmawe narūxī nhuxmata naga naxīnūē i ngēma duūxūgū i chixexū i norū doramaā nawomūxēēgūxū rü nachixexēēgūchaūxū. Notürü i jixema rü tama name na ngēxgumarūū ixīgūxū. ¹⁵Rü name nixī i jigū ingechaūgūācūma nagu taxī i ngēma ore i aixcuma ixīxū, na ngēmaācü jexeraācü naxrūū ixīgūxūcax ja Cristu ja guxūma i jaxōgūxūārū āēxgacū ixīcū. ¹⁶Rü taeru ja Cristuwa nixī i ne naxūxū i tórū pora na naxcax imaxēxūcax. Rü guxāma i jixema rü wūxigu naxmexwa tangēxmagū. Rü ngēxguma Cristugagu meā wūxigu ipuracūegu rü jigū rüngūxēēgu rü guxūma meāma inixū. Rü ngēmaācü jigū ingechaūgūācūma norū orewa tijaetanū na dūxwa nūma nanaxwaxexūācūma ixīgūxūcax.

**Maxū i ngexwacaxūxū i Cristugagu
tūxū ngēxmaxū**

¹⁷Rü nhuxma rü Cristuégagu pexū chaxucuxē na tama nagu pexīxū i

ngēma chixexū ga noxri nagu pexīxūcāx ga jexguma taūta Cristuaxū pejaxōgūgu. Rü tama name i nagu pexī i nacūmagū i ngēma duūxūgū i tama Tupanaxū cuaxgūxū i naēchitamare maxēxū. ¹⁸Erü Chataná rü nanatoōēgū i ngēma duūxūgū, rü ngēmacax chixexūguxicatama narūxīnūē. Rü nagagugūtama nūxū nataxuma i maxū i taguma gūxū i Tupanawa ne ūxū, erü tama nūxū nacuaxgūchaū. ¹⁹Rü tama naxāneē na tacū rü chixexū na naxūgūxū, rü ngēmacax nagu naxī rü nūxū namepua i guxūraūxū i chixexūgū na naxūgūxū. ²⁰Notürü i pema rü tama ngēmaācü na pemaxēxūcax nixī i Cristuaxū pejaxōgūxū. ²¹Jerü pema rü marū meā nūxū pexīnūē ga Cristuchiga. Rü toxūtawa naxcax pengūe, rü nūxū pecuax i norū ore i aixcuma ixīxū na nhuxācü Ngechuchu naxwaxexūācūma na pemaxēxū. ²²Rü ngēmacax name nixī i nūxū perūxoe i ngēma nuxcūmaxūxū i pecūmagū ga ūpa nagu pexīxū. Jerü jema nuxcūmaxūxū ga perū maxū rü nachixexūchi. Rü pexū napora rü pexū nawomūxēēgū na nagu pexīxūcax ga jema pexeneārū ngūchaūgū i tama mexū. Notürü i nhuxma rü name nixī i nūxū perūxoe i guxūma i ngēma. ²³Rü ngēmacax i nhuxma na Cristuarü duūxūgū peixīgūxū rü name nixī na Tupanaguxicatama perūxīnūēxū. Rü name nixī i Tupanana pegū pexāgū na Naāē i Ūūnexū pewa puracūxūcax rü na nangexwacaxūxēēāxūcax i peāē. ²⁴Rü name nixī i penajaxu i ngexwacaxūxū i pecūma i Tupana norū ngūchaūmaā pexcax mexēēxū. Rü ngēma nacūma i ngexwacaxūxū rü perū maxū i mexūwa

tá nangox i ngëxguma nagu pexĩxgu i ngëma ore i aixcuma ixĩxũ rü tama nawe perũxĩxgu i pexeneärü ngúchaũ. ²⁵Rü ngëmacax i nhuxma na Cristuarü peixĩgũxũ rü tama name na peidorataaxgũxũ. Notürü name nixĩ i wüxichigü rü tümamücümaã aixcumaxũ tixu. Erü guxãma i jixema rü jigütanũxũ i jaxõgũxũ tixĩgü. ²⁶Rü ngëxguma texé tacü peãëwa nguxëëgu rü ¡pegüna pedaugü na tama pecadu pexũxũcax! Rü tama name i nagu perũxĩnũëëcha notürü name nixĩ i paxa ngëmatama i ngunexũgu nüxũ ipejarüngüma i ngëma naxũpa na janaxücuxũ ja üaxcü. ²⁷Rü pegüna pedaugü na tama penaxüchicaxũcax i Chataná na ngëmaãcü najoxniëxũcax rü pemaã inacaxũcax. ²⁸Rü ngëxguma texé petanüwa ngĩtaaxgu ga üpa, rü name nixĩ i nüxũ tarüxo i ngëma. Rü name nixĩ i tümamëxëmaã meã tapuracü na ngëmaãcü tüxũ nangëxmaxũcax i tümäärü ngëmaxũ na toguãx ja tüxũ nataxüemaã tangauxũcax. ²⁹Rü tama name i chixexũ i oremaã peidexagü. Notürü name nixĩ i ore i mexũmaã peidexagü na ngëmaãcü ngëma duũxũgü i pexũ inüëxũxũ perüngũxëëgũxũcax na jexeraãcü Tupanaga naxĩnũëxũcax rü nataãëgũxũcax. ³⁰¡Rü pexuãëgü na tama penangechaũxëëxũcax i Tupanaãë i Üünexũ! Erü ngëma Naãë i Üünexũ nixĩ i Tupana pexna muxũ na nüxũ pecuáxũcax na aixcuma norü duũxũgü peixĩgũxũ nhuxmatáta ngëma ngunexũ i nagu pexcax núma naxũxũ ja Cristu. ³¹¡Rü nüxũ perüxoe na nagu perũxĩnũëëchaxũ ega texé tacü rü

chixexũ pemaã üxgux! Rü ngëxgumarüü ta name nixĩ na nüxũ perüxoexũ na aigu perũxĩnũëxũ, rü exna penuëxũ, rü exna pegü na pengaexũ, rü exna peguxchigawaxegũxũ. Rü ngëmaãcü name nixĩ na nüxũ perüxoexũ i guxũma i ngëma chixexũ i dexagü. ³²Rü name nixĩ i pegü perüngũxëëgü rü pegümaã pemecümagü, rü pegũxũ pengechaũtümüügü i wüxichigü. Rü ngëxguma petanüwa texé tacü rü chixexũ pemaã üxgux, rü name nixĩ i pegũxũ nüxũ pengechaũgü i wüxichigü jema na Cristugagu Tupana pexũ nüxũ nangechaũxürüü.

Name nixĩ i meã namaxë i Tupanaxãcügü

5 ¹Rü nhuxma rü Tupanaxãcügü ja pexũ nangechaũgüxe peixĩgü. Rü ngëmacax name nixĩ i naxcax pedau na naxrüü meã pemaxëxũ rü naxrüü peimexũ. ²Rü name nixĩ i pegü pengechaũgü jema Cristu tüxũ na ngechaũxürüü. Rü nüma rü taxcax nügü inaxã rü taxcax naju. Rü jemaãcü Tupanaxũ nataãëxëë jerü jemaãcü tüxũ namaxëxëë. ³Rü nhuxma rü Tupanaärü duũxũgü peixĩgü. Rü ngëmacax tama name i naĩ i ngemaã rü exna naĩ ja jatümaã na ipepexũ. Rü tama name na pexeneärü ngúchaũwe perüxĩxũ rü exna pegüna penanuãchigüchaũxũ i tacü i ngëmaxũgü. Rü ngëmacax name nixĩ i nüxũ perüxoe i guxũma i ngëma chixexũgü, rü bai i nachiga na peidexagümarexũ. ⁴Rü tama name i tacü rü ore i ãũãchixũxũ peixu, rü bai i tacü rü ngeãëxũmare peixu, rü bai i texéxũ pecugücüraxũ. Erü ngëma ore i

chixexũgũ rü taxuwama name. Rü narümemã nixĩ i Tupanana moxẽ pexãgũ. ⁵Rü aixcuma pemaã nüxũ chixu rü ngëxguma texé naĩ i ngemaã rü exna naĩ ja jatümaã ipexgu, rü exna tümaxũneãrũ ngúchaũ taxũxgu, rü taxucürüwama taxãchica i ngextá tórü Cori ja Cristu rü Tanatü ja Tupana ãëxgacü fixixũwa. Rü ngëxgumarüũ ta taxucürüwama texé ngëma taxãchica ega tügüna tananuãchigüchaũxgu i tacü rü ngëmaxũgũ. Erü jixema ngëma nacüma tüxü ngëmaxẽ rü düxwa namaã tatupanaãx i ngëma nacüma i chixexũ. ⁶Rü tama naga pexĩnüẽ ega texé tacü rü ore i ngëãmarexümaã pexũ womüxëẽchaũgu na penaxüxcãx i ngëma chixexũgũ! Erü ngëma chixexũgügagu nixĩ i Tupana tá poraãcü napocuxũ i ngëma duũxũgũ i tama naga ñnüẽxũ. ⁷Rü ngëmacãx tama name i ngëma duũxũgümaã pexãmücügü na pema rü ta tama penaxüxcãx i ngëma chixexũgũ. ⁸Rü üpa ga pema rü ëãnexüwa pejexmagü, jerü tama Tupanaxü pecuãx rü chixri pemaxẽ. Notürü i nhuxma na Tupanaxü pecuáxü rü tórü Coriarü duũxũgü na peixĩgüxũ, rü ngóonexüwa pengëxmagü. Rü ngëmacãx name nixĩ i duũxũgü i ngóonexüwa ngëxmagüxürüũ meã na pemaxëxũ. ⁹Erü ngëxguma ngóonexüwa ingëxmagu, rü mexũ taxügü, rü nagu taxĩ i ore i aixcuma ixixũ, rü meã tamaxẽ. ¹⁰Rü ngëmacãx name nixĩ i naxcãx pedau na nagu pexixũ i ngëma maxũ i tórü Cori namaã taãëxũ. ¹¹Rü tama name i pema rü ta penaxü i ngëma chixexũgü i taxuwama mexũ i ngëma togü i duũxũgü i ëãnexüwa ngëxmagüxũ

ügüxũ. Notürü narümemã nixĩ i penangoxëẽ na nachixexũ i ngëma naxügüxũ. ¹²Erü ngëma chixexũ i cúãcüma naxügüxũ i ngëma jatügü rü ngëxũgü, rü woo nachiga idexagümaregu rü wüxi i ãnexũchi nixĩ. ¹³Notürü ngëxguma ngóonexüwa nangëxmagu i tacü rü chixexũgü rü meã tá nangox na nhuxãcü nachixexũ. ¹⁴Erü guxũma i tacü i ngëxmaxũ, rü ngëxguma ngóonexüwa nangëxmagu, rü meãma nangox na nhuxãcü jixũ. Rü ngëmacãx i Tupanaãrü orewa rü nhanagürtü:

“¡Nabaixãchi i cuma na cupexũ! ¡Rü írüda i cuma na icujarütaxuxũ! ¡Rü nagu rüxĩnü na nhuxãcü nachixexũ i ngëma curü pecadugü! Rü Cristu tá cuxcãx nanangóonexëẽ rü tá cuxũ narüngũxëẽ na Tupanaxü cucuáxcãx”,

nhanagürtü i ngëma orewa. ¹⁵Rü ngëmacãx name nixĩ i pexuãëgü rü meã pemaxẽ. Rü tama name i ngëma duũxũgü i tama Tupanaãrü orexũ cuãxgüxürüũãcüma na pemaxëxũ, notürü penaxwaxe na duũxũgü i meã Tupanaga ñnüẽxürüũ meã na pemaxëxũ. ¹⁶Rü nhuxma na Tupana pexũ jatauxchaãchixëẽxũ rü ¡pepaxaãëgü na nüxũ pepuracüxũ rü penaxixũ i ngëma nüma nanaxwaxexũ! Erü nhamaücüü i duũxũgü rü poraãcü chixexũ naxügü. ¹⁷Rü nhuxma na ngëmaãcü namaxëxũ i togü i duũxũgü, rü tama name na naxrüü peixĩgüxũ. Rü tama penaxwaxe i duũxũgü i ngëãmarexürüũ peixĩgü. Notürü name nixĩ i Tupanaãrü orewa pengüé na nüxũ pecuáxcãx i tacü na

jiixũ i tórũ Cori pexũ naxwaxexũ na penaxũxũ. ¹⁸Rũ tama name i tacũ rũ axchiũ i ngũchixáxũmaã pengãxê, erũ ngêma rũ chixexũ tũxũ naxũxêe i ngêxguma ngêmaãcũ imaxêgu. Notürũ name nixĩ i Tupanaãe i Üünexũna pegũ pexãgũ na pewa nangêxmaxũcax rũ pemaã inacuáxũcax. ¹⁹Rũ name nixĩ i Tupanaãrũ orechigagu rũ norũ wijaegũgu pegũmaã peidexagũ rũ pegũmaã nüxũ peixu. Rũ name nixĩ i nagũxũraũxũ i norũ wijaegũgu pewijaegũ, na ngêmaãcũ guxũne ja perũ maxũnemaã tórũ Corixũ peicuaxũũgũxũcax. ²⁰Rũ name nixĩ i guxũguma tórũ Cori ja Ngechuchu ja Cristuégagu moxê nüxna pexãgũ ja Tanatũ ja Tupana naxcax i guxũma.

Nhuxãcũ meã nügũmaã namaxê i wũxi ja ĩpatacũĀx i Cristuaxũ jaxögũxũ

²¹Rũ nhuxma na Cristumêxêwa pengêxmagũxũ, rũ name nixĩ i pegũga pexĩnũe i wũxichigũ, erũ Cristuxũ pengechaũgũ rũ naga pexĩnũe. ²²Rũ pemax, Pa Ngexũgũx, rũ ngêma tórũ Cori naxwaxexũrũ rũ name nixĩ na petega pexĩnũexũ. ²³Erũ nüma ja jatũ rũ namãxêru nixĩ, ngêxgumarũũ ja Cristu na guxũma i jaxögũxũêru na jiixũ. Rũ nümagũ i jaxögũxũ rũ Cristuxũne nixĩgũ rũ nüma ja Cristu nixĩ i norũ maxêxêêruũ jiixũ. ²⁴Rũ ngêxgumarũũ na Cristuga naxĩnũexũ i ngêma jaxögũxũ, rũ ngêxgumarũũ ta i ngexũgũ rũ name nixĩ na guxũguma natega naxĩnũexũ. ²⁵Rũ name nixĩ i namãxũ nangechaũ ja jatũ, jema Cristu guxãma ga jaxögũxexũ na nangechaũxũrũ. Rũ

jema na tũxũ nangechaũxũcax nixĩ ga najuxũ ga Cristu. ²⁶Rũ jemaãcũ nanaxũ ga Cristu na nügũxũ tũxũ jadexechixũcax rũ tũxũ jaxũünexêxũcax i guxãma i jixema na jaxögũxũ. Rũ norũ oremaã rũ ngêma dexá i nawa ĩbaiũxũmaã tũxũ nimexêe na aixcuma napexewa imexũcax. ²⁷Rũ jemaãcũ tũxũ nimexêe na nügũtama tũxũ nawéxũcax na aixcuma guxũwama imexũ rũ na nataxuxũma i tacũ i tórũ chixexũ rũ bai i ĩraruwa i ngêxguma napexewa ingugũgu. Erũ tũxũ nidexechi na ixũünegũxũcax rũ guxũwama imexũcax i napexewa. ²⁸Rũ jema Cristu tũxũ na ngechaũxũrũ, rũ wũxichigũ ja jatũ rũ nanaxwaxe na namãxũ nangechaũxũ nhama nügũxũnexũ na nangechaũxũrũtũtama. Rũ jixema tũmamãxũ ngechaũxê rũ tũgũtama nixĩ i tangechaũxũ. ²⁹Erũ tataxuma ja texé ja tũmaxũnechitama aixe, notürũ tanaxũwemũ rũ meãma nüxna tadau ngêma Cristu guxũma i jaxögũxũna dauxũrũ. ³⁰Rũ guxãma i jixema na jaxögũxũ rũ Cristuna taxũgũ rũ ngêmaãcũ naxũne tixĩgũ. Rũ nüma tũxna nadau. ³¹Rũ ngêmacax i Tupanaãrũ ore i ũmatũxũwa rũ nhanagũrũ:

“Rũ wũxichigũ ja jatũ rũ nanatũna rũ naêna tá nixũgachi na namãxmaã inaxãxũcax. Rũ ngêma taxre rũ wũxi tátama nixĩgũ”,

nhanagũrũ i ngêma ore. ³²Rũ ngêma ore i jatũchiga rũ namãxchiga rũ wũxi i ore i aixcuma mexũ nixĩ. Notürũ nhuxma na pemaã nüxũ chixuxũ i ngêma rũ Cristuchiga rũ jaxögũxũchiga nixĩ i

chidexaxũ. ³³Notürü ngêma ore rü pechiga ta nixĩ. Rü ngêmacax i wüichigü i pema i jatügü rü name nixĩ i pemaũ na pengechaũxũ ngêma pegütama na pengechaũxürüũ. Rü ngêxgumarüũ ta i pema i ngexũgü rü penaxwaxe i petega pexĩnüë.

6 ¹Pa Buxũgüx, nhuxma na Cristuarü peixĩgüxũ, rü name nixĩ i penatüga rü peega pexĩnüë, erü ngêma nixĩ i aixcuma mexũ. ²⁻³Jerü jema mugü ga Tupana Muíséna äxũtaniwa rü jema mu ga nüxĩra wüxi ga unetamaã Tupana nüxũ ixuxũ, rü nhanagürü:

“₁Rü tüxũ nangechaũ rü tüxũ rüngüxëë ja cunatu rü cue na aixcuma cutaãxüçax rü namáxüçax i curü maxũ i nhama i naãnewa!”

nhanagürü. ⁴Rü pemax, Pa Papagü rü Pa Mamagüx, rü tama name i penangamare rü penanuëxëë i pexacügü. Rü name nixĩ i meã penajaexëë, rü pejaxucuxëgü rü penangüxëë na meã tórü Coriaxũ jaxögüäxüçax. ⁵Rü pemagü, Pa Duũxũgü ja Ixãärü Coriaxgüe, rü name nixĩ i meã naga pexĩnüë i perü corigü i nhama i naãnewa. Rü penaxwaxe i nüxũ pengechaũgüäcuma rü nüxũ pemuëäcuma meã naga pexĩnüë nhama Cristuaxũ pepuracüexürüũ. ⁶Rü tama name ega perü corigü pexũ dawenüguxicatama meã nüxũ pepuracüe na ngêmaäcü pemaã nataãxüçax. Notürü nhuxma na Cristuarü duũxũgü peixĩgüxũ, rü name nixĩ i guxũma i perü ngüchaũmaã penaxü i ngêma Tupana pexũ naxwaxexũ. ⁷Rü ngêma puracü i perü

cori pexna äxũ, rü name nixĩ i petaãäcuma penaxü, nhama tórü Cori ja Ngechuchuaxũ pepuracüexürüũ. Erü aixcuma nüxũ nixĩ i pepuracüexũ rü tama i duũxũgüaxũ. ⁸Rü name nixĩ i ngêmaäcü meã pepuracüe, erü nüxũ pecuax rü wüichigü i duũxũ rü woo wüxi i coriarü duũxũ jixĩgu rü exna taxúxearü jixĩgu, notürü tórü Cori ja Ngechuchu tá nüxũ nanaxütanü naxçax i ngêma mexũ i naxüxũ. ⁹Rü pemax, Pa Corigüx, rü name nixĩ i ngêxgumarüũ ta meã namaã pemaxë i perü duũxũgü. Rü tama name i tacü rü chixexũmaã penaxäxüne. Rü nüxna pecuaxächie na pema rü ta perü duũxũgürüũ tórü Cori ja dauxügucümexëwa na pengëxmagüxũ. Rü aixcuma guxãma i jixema rü tawüxigu i napexewa ja tórü Cori ja Cristu.

**Cristuarü duũxũgüarü poxürü i
Tupana nüxna äxũ na nügü
namaã inapoxũgüxüçax
naxchaxwa i Chataná**

¹⁰Rü nhuxma Pa Chaueneëgüx, rü name nixĩ i penajaxu i tórü Coriarü pora na namaã peporaexüçax. Erü nüma rü naporaxüchima rü ngêmacax nüxũ natauxcha na pexũ naporaxëëxüçax. ¹¹Rü name nixĩ i penajaxu i guxũma i perü poxürü i Tupana pexna äxũ na ngêmaäcü pegü ípoxüxüçax rü aixcuma peporaexüçax i ngêxguma Chataná pexũ womüxëëchaũgu. ¹²Erü tama duũxũgü i taxrüũ ämachixũ rü äxchinaxäxũmaã nixĩ i jigü idaixũ. Notürü ngêma namaã jigü idaixũ nixĩ i Chatanáärü duũxũgü i ngoxogü i chixexũgü i poraxë. Rü nümagü rü

namuxūchi rü tüxū
 narüporamaēgūchaĩ. Rü tama nüxū
 tadaugü erü naãēgü nixĩ, notürü
 guxūwama nangēxmagü i nhama i
 naãnewa. Rü namaã inacuax i nhama i
 naãne i chixexū. ¹³Rü ngēmacax name
 nixĩ i penajauxgü i guxūma i ngēma
 perü poxūruũ i Tupana pexna āxū, na
 ngēmaācü pegü ípexoxūxūcax rü nüxū
 perüjexeraxūcax i ngēxguma ngēma
 naãēgü i chixexū pexū
 rüporamaēchaũgu. Rü ngēmaācü
 tāxūtāma nüxū penguxū i ngēxguma
 ngēma naãēgü i chixexū pexū
 rüjexerachaũgu. ¹⁴Pema nüxū pecuax rü
 ngēxguma nügü nadaixchaũgu i
 churaragü rü nagúxūraũxū i norü
 poxūruũ nügü naxügu na tama norü
 uwanügu nüxū rüporamaēgüxūcax. Rü
 pema penaxwaxe na Tupanaärü
 churaragü i mexū na peixīgüxū. Rü
 ngēmacax name nixĩ i penajauxgü i
 guxūma i ngēma poxūruũ i Tupana
 pexna āxū. Rü wüxi i churara rü nügü
 nigoje namaã i norü gojexū i
 tachipanüxū na ngēmamaã nügü
 ínapoxūxūcax i napütüwewa. Rü
 ngēxgumarüũ ta i pema rü penaxwaxe
 na ngēma ore i aixcuma ixĩxūgu pexĩxū
 na ngēmaācü pegü ípexoxūxūcax nawa i
 chixexūgü. Rü wüxi i churara rü
 najangaxcuchi i naremüärü poxūruũ na
 ngēmaācü nügü ínapoxūxūcax. Rü
 ngēxgumarüũ ta i pema rü penaxwaxe
 na pexū nangēxmaxū i perü maxū i
 aixcuma Tupanapexewa mexū na
 ngēmaācü pegü ípexoxūxūcax nawa i
 chixexūgü. ¹⁵Rü wüxi i churara rü
 nicuaixcuchi i norü chapatu na nüxū
 natauxchaxūcax na ijaxūxū. Rü

ngēxgumarüũ ta i pema rü penaxwaxe
 na meã ípememarexū na ípexĩāchixū na
 nüxū peixuxū i ngēma ore i mexū i
 Tupanamaã tüxū rüngüxmüēxēxū rü
 tüxū taãēxēxū. ¹⁶Rü wüxi i churara rü
 nügüchacüüwa najangaxcuchi i norü
 poxūruũ i ātachinüxū i namaã nügü
 ínapoxūxū. Rü ngēxgumarüũ ta i pema
 rü penaxwaxe na aixcuma Cristuaxū
 pejaxōgüxū na ngēmaācü pegü
 ípexoxūxūcax nüxna i Chatanáne i
 āücümaxū i namaã tüxū
 nachixexēēchaũxū. ¹⁷Rü wüxi i churara
 rü nüxū nangēxma i napatexē i norü
 poxūruũ i naēruwa. Rü ngēxgumarüũ ta
 i pema rü penaxwaxe na pexū
 nangēxmaxūcax i perü maxū i taguma
 gúxū na ngēmamaã pegü ípexoxūxūcax.
 Rü penaxwaxe i pexū nangēxma i
 ngēma pexne i wüxi i tararüũ ixĩxū. Rü
 ngēma pexne nixĩ i Tupanaärü ore i
 mexū i Naãe i Üünexū pexna āxū. ¹⁸Rü
 tama name i nüxū perüchawe na
 pejumuxēgüxū. Notürü name nixĩ i
 guxūguma Tupanaãe i Üünexūärü
 ngüxēemaã Tupanaxū pecaaxū rü
 guxūraũācü pejumuxēgü. Rü name nixĩ i
 pexuāēgü na guxūguma ngēmaācü
 pejumuxēgüxū rü taguma nüxū
 perüxoexū. Rü penaxwaxe i tümacax
 pejumuxēgü ja guxāma ja texé ja
 Tupanaärü duũxügu ixīgüxe. ¹⁹Rü
 ngēxgumarüũ ta chanaxwaxe na
 chauxcax pejumuxēgüxū na Tupana
 choxū rüngüxēēxūcax rü choxna
 naxāāxūcax i ngēma ore i nüma
 nanaxwaxexū na nüxū chixuxū. Rü
 chanaxwaxe i Tupanana naxcax peca na
 choxū naporaxēēxūcax na tama
 chamuũācüma meãma nüxū chixuxūcax

i norü ore i mexĩ ga noxri duũxũgũ
tama nüxũ cuáxũ i Cristuchiga. ²⁰Rũ
ngẽma orexũ na chixuxũcax nixĩ ga
Tupana nügũchicũtü choxũ namuxũ, rü
ngẽmacax nixĩ i chapocuxũ i nhuxmax.
Rũ chanaxwaxe i chauxcax pejumuxẽgũ
na tama chamuũãcũma meãma nüma
nanaxwaxexũãcũma nüxũ chixuxũcax i
ngẽma norü ore.

**Pauru nanaguxẽẽ ga norü popera rü
wenaxãrũ jema duũxũgũxũ
narüimoxẽ**

²¹Rũ taeneẽ ja nüxũ ingechaũcü ja
Tíquicu, rü chauxrũũ aixcuma meãma
napuracũ i tórü Coriarũ puracũwa. Rũ
nüma tá pemaã nüxũ nixu i
chauchiga rü guxũma i nhuxãcü
choxũ na naxüpetũxũ i nuã. ²²Rũ

ngẽmacax nixĩ i pexũtawã
chanamuxũ, na pemaã nüxũ
jaxuxũcax na nhuxãcü toxũ
naxüpetũxũ, na ngẽmaãcü pexũ
nataãẽxẽẽxũcax. ²³Pa Toeneẽgũ i
Jaxõgũxũx, chanaxwaxe i Tanatũ ja
Tupana rü tórü Cori ja Ngechuchu ja
Cristu pexũ narüngũxẽẽgũ i guxãma i
pema na meã pegũmaã pemaxẽxũcax,
rü aixcuma petaãẽgũxũcax, rü pegũ
pengechaũgũxũcax rü meã
pejaxõgũxũcax. ²⁴Rũ chanaxwaxe i
Tanatũ ja Tupana nüxũ narüngũxẽẽ i
guxũma i ngẽma duũxũgũ i
aixcumaxũchi tórü Cori ja Ngechuchu
ja Cristuxũ ngechaũgũxũ. Rũ
ngẽmaãcü jiĩxũ.

*Rü nuãma pexna,
Pauru*